

Bulteno de la Londona Esperanto-Klubo

londonaesperantoklubo.com

Julio - Aŭgusto 2025



Fotis Rico Giacometto.

Promeno en Parko de Grenviĉo

Vendrede, 27an de Junio, la tradicia kluba promeno okazis, kaj ĉijare ni vizitis la parkon de Grenviĉo, en suda Londono. Ni estis ĉirkaŭ 15 uloj (mi forgesis pli precize numeri). Ni piediris ĝis kaj ene de la parko dum iom pli ol du horoj, finante ĉe loko de kie vidi grandan parton de la urbo je sunsubiro; ni iris sen hasto kaj en bela vetero, do mi volas diri ke la okazo estis sukcesa! Mi skribas ĉi tie iom da informo pri la parko, por tiuj kiu volas memori, aŭ kiuj ne povis ĉeesti la promenon.

La parko estas unu el 8 reĝaj parkoj de Londono, kaj etendiĝas tra 74 hektaroj. Ene de ĝi estas florigardeno, sovaĝejo por cervoj, multe da skulptitaj herbejoj, kaj historiaj lokoj inkluzive de fama

observejo. Ni vidis iom multe de tiuj, sed bedaŭrinde neniu cervo aperis al ni.

Tre resume, la historio de la parko estas ke en 1427 reĝo akiris la terenon; dum 300 jaroj ĝi restis privata, kaj alia reĝo eĉ konstruis muron tute ĉirkaŭe, kio ankoraŭ ekzistas; ekde la 18a jarcento, la publiko rajtas viziti kaj ĝui.

Eble plej fama estas la observejo, kio estis dumlonge hejmo de astronomio en Britio. Oni konstruis ĝin, kiel la unuan konstruaĵon en Britio kreitan precipe por scienco, en 1675, kaj samtempe kreis postenon de astronomiisto reĝa. Tiu ulo unue respondecis pri mapigi stelojn sufiĉe precize por helpi pri ŝiprado sur maro. Parenteze, en 1894

anarĥiisto ne-intence eksplodigis sin per bombo proksime la observejon, kaj tiel inspiris romanon de Joseph Conrad, *La sekreta agento*.

Nevizitaj ĉifoje estas aliaj famejoj de Grenviĉo. En tiu urboparto estas la observejo (ni iris al ĝi, sed ne en ĝin); muzeo de ŝiprado; klasikstila reĝa domo, nun artmuzeo; kaj Cutty Sark, fame pro esti plej rapide velŝipo de la mondo, tuj antaŭ la fino de la epoko de velŝipoj.

La sola manko en la sperto estis en nia scio pri nomoj de arboj!

Phil Housley



Kluba programo

Julio

11. **Ludoj** surloke en Highbury.



12. **Kafo, kuko kaj... Esperanto!**, kun la klubo de Reading kaj Oksfordo.



Aŭgusto

8. **Lingva diskuto** surloke en Highbury.



Somero en Londono

Kio okazas somere? Ne tiom multe oficiale, sed tio ne estu limo. Kiel ni faras ĉiujare, la kluba programo estas malpeza dum la sekvaj du monatoj, sen la ret-kunvenoj, kaj sen rigora plano. Por tiuj kiuj restos en la urbo ni organizos kunvenojn en Highbury, kun intenco ke ili estus tre sociaj, kaj neformalaj. Se vi konas iun kiu ŝatus lerni ion pri ni kaj pri Esperanto, ili estus tre bonvenaj. Pri la temo de novuloj, mi havas multe pli por diri en ĉi tiu paĝo.

La 11an de Julio ni havos ludvesperon. La ludo ne estas jam elektita, do bonvolu sugesti. Eble ni provu ion novan, aŭ eble ni restu kun io familiara? Mi (Phil) havas ideon provi simplan rolludon; ludo en kiu oni kunlaboras por krei rakonton. Mi ne scias ĉu tio estus taŭga, ĉar mi neniam provis ĝin, do ĝi certe ne estos la sola plano.

En aŭgusto, ni renkontiĝos por kunhavigi demandojn pri nia lingvo kaj ĝia uzo, kaj eventuale trovi respondojn. Se vi havas dubojn pri signifo de iu vorto, aŭ ĝusteco de iu gramatikaĵo, tio estos bona tempo kaj loko por pripensi. Mi ne diras ke ĝi estos leciono, sed mi esperas lerni ion.

Ankaŭ, ni uzu la tempon por komenci tiujn projektojn kiujn mi jam menciis. Se vi volas helpi pri tiuj, aŭ simple volas aranĝi alian okazaĵon dum la bona vetero, mi vin memorigas ke ni havas retpoŝtliston kaj Telegram-kanalon, kaj vi ĉiuj rajtas uzi ambaŭ,

Nia kunvenejo

Highbury View, 89 Ronalds Road, London, N5 1XQ

La ejo estas facile atingebla de la metrostacio Highbury & Islington. Temas pri pli-malpli 10-minuta piedirado. Atentu, ke **por eniri la ejon, oni bezonas enirkodon**. Se vi ne konas ĝin kaj intencas ĉeesti, bv. kontakti nin per la kontakto-paĝo en nia retejo por havi la kodon.

Kaj en Reading ...

Venu al la sekva renkontiĝo de la plej afabla Esperanto-grupo en la mondo.

La grupo kore bonvenigas ĉiajn parolantojn, de la komencantoj ĝis la spertuloj. Se vi neniam spertis babiladon en la lingvo, venu kaj ekparolu!

Ni renkontiĝos la 12an de Julio, ekde la 10:30 matene ĉe The Pantry, Café & Kitchen, Blagrove St, Reading RG1 1QH.

NB: Bonvolu sciigi nin antaŭe, ke vi intencas ĉeesti. Sendu retmesaĝon pere de eventaservo.org/e/78eafd. Tiel ni scios kiom da homoj ni atendas kaj povos pli bone elekti kie sidi en la renkontiĝejo.

Venu por uzi vian Esperanton kun aliaj parolantoj en amika etoso.

Rico Giacometto



Kaj post la somero?

Kvankam somero nur komenciĝas, nia kluba penso nun temas pri tio kio sekvos. En septembro venos nova lern-sesio por multaj, kaj ankaŭ por ni. Niajn kursojn ni rekomencos, kaj ni havos novan oportunon por akiri novajn lernantojn.

Ĉi tiu numero de la bulteno estas iom malsama ol kutimo, pro nia somero paŭzeto, sed ankaŭ iom malsamos la sekva. Nia plano estas ke la fokuso de la septembra-oktobra numero estos instruado kaj lernado. La bulteno estos tute dulingve (en esperanto kaj la angla), kaj tiel ĉiu leganto povos tuj vidi kaj kompreni. Tio implicas ke ni volas ke kiel eble pli multe da homoj vidu, kaj pensu pri aliĝo al niaj kursoj.

Por prezenti Esperanton, mi sugestas ĉeftemon "Esperanto estas por homoj". En mondo en kiu multaj kuras ĝis "artefarita intelekto", ni povas prezenti Esperanton kiel alternativon. Ni ofertas komunikilon kio estas reala kaj homeca. Oni ne bezonas dependi de iloj nekompreneblaj por atingi homan interagon. La defio estos kiel prezenti tion, kaj ankaŭ kiel meti ĝin antaŭ kiel eble plej multe da homoj. Ni provu prepari la bultenon frue, kaj aranĝu disvastigon.

Samtempe, ni volas fini renovigon de nia retejo. La celo tie estas ke ĝi aspektu freŝa al novaj vizitantoj. Estu sufiĉe da novaĵoj, por ke oni vidu ke ni vere aktivis, kaj ankaŭ por faciligi transiron al lernado.

Krom tio, la klubo deziras al vi bonan kaj pacan someron.